



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Conciliorvm Omnium Generalium Et Provincialium Collectio Regia**

Ab anno MCCCCXXXVIII. ad annum MCCCCXL.

**Parisiis, 1644**

Evgenii Summi Pontificis Salvvs Conductvs Pro Graecis In Italiam  
accedentibus, ac forma procedendi in causis criminalibus & ciuilibus inter  
Latinos & Graecos.

**urn:nbn:de:hbz:466:1-15490**

ANNO  
CHRISTI  
1438.

ducendi, vniuersosque officiales armatos, & remiges inobedientes, seu quomodolibet delinquentes, aut aliquo modo excedentes secundum iustitiam & tuæ voluntatis arbitrium puniendi & corrigendi, ac in eos merum & mixtum imperium exercendi, & omnia & singula faciendi, quæ ad plenissimum capitaneatus officium dignoscuntur de iure vel consuetudine pertinere, iuxta formam & consuetudinē commissionum, quæ a dilectis filiis domini Venetorum similibus armatarum capitaneis in Romaniam mitti consuetis dari consueuerunt, concedentes plenam & liberam potestatem: districtè quoque mandantes patronis, officialibus, hominibus armatis, & remigibus supradictis, quatenus tibi tamquam eorum capitaneo plene pareant & intendant. Curet itaque deuotio tua traditum tibi officium huiusmodi sic attente, diligenter & solícite exercere, quod tua probitas virtuosa votiuum & speratum in hac parte fructum pariat, quodque præter diuinum præmium, quod exinde merebis, amplam tibi nostram & apostolicæ sedis gratiam merearis. Datum, &c. 6. Iulii.

EVGENII SVMMI PONTIFICIS SALVVS Num. IX.

CONDVCTVS PRO GRÆCIS IN ITALIAM

accedentibus, ac forma procedendi in causis  
criminalibus & ciuilibus inter

Latinos & Græcos.

*Eugenius episcopus seruus seruorum Dei, ad perpetuam  
rei memoriam.*

*Carissimo in Christo filio Ioanni Palæologo imperatori Romæo-  
rum illustri, & venerabili fratri Iosepho patriarchæ  
Constantinopolitano salutem, &c.*

QVIA annuente Domino in Italia fiet vniuersalis & catholica Synodus, in qua iuxta concordata in Synodo Basileensi, & in Constantinopoli postmodum confirmata, occidentalis & orientalis ecclesia conueniet: cupientefque, vt omnibus nostræ mentis caritas appareat, & omnis suspicio, quæ circa facultatem & libertatem venientium exhiberi possit, de medio tollatur, tenore præsentium damus, concedimus vobis imperatori & patriarchæ prædictis, aliisque venerabilibus fratribus, Alexandrino,

*Concil. Tom. 33.*

E

Antiocheno, Hierosolymitano, patriarchis, omnibusque vobiscum & cum ipsis vsque ad numerum septingentarum personarum cuiuscumque status, gradus, ordinis vel dignitatis, tam spiritualis, quam temporalis existant, ad vniuersalem & catholicam Synodum prædictam accedentibus, vel venientibus, plenum & liberum saluumconductum, omnesque prædictos & eorum quemlibet cum personis & rebus suis, in omnibus regnis, prouinciis, dominiis, ciuitatibus, arcibus, castris, villis ac locis subiectis obedientiæ Romanæ, per quæ ire, stare, redire & recedere, vel transire contigerit, ad nostram liberam & firmam custodiam recipimus: per præsentem promittentes omnibus, & eorum singulis, tenore præsentium, securam & liberam facultatem eundi & redeundi ad Italiam prædictam, & illic standi, morandi, conuersandi, & cum omnibus securitatibus, libertatibus & facultatibus, cum iis qui obedientiæ sanctæ Romanæ ecclesiæ dediti & subiecti sunt, disputandi, syllogizandi, iusta & rationabilia proponendi, omniaque alia libere & sine impedimento aliquo faciendi & exponendi, quæ ad vnionem ecclesiarum Christi illis conferre videbuntur; insimul & diuisim cum bonis propriis, rebus & substantiis suis, recedendi quoque, eundi & redeundi secure & libere sine læsione, omni impedimento reali & personali cessante, & penitus remoto.

Item si hæc vnio (quod Deus auertat) non sequeretur, nec ad optatum finem procederet, prædicti imperator & patriarcha, & alii superius nominati, nostris sumptibus & galeis, sine longitudine temporis, ac omni impedimento cessante, cum honore suo, bona voluntate nostra, quemadmodum ad prædictam catholicam futuram Synodum venerunt, ita Constantinopolim redeant, siue vnio in dicta Synodo secuta fuerit, siue non. Non obstantibus in prædictis, & quomodolibet prædictorum aliquibus differentiis, discordiis & diuisionibus tam præteritis, quam quæ præsentia ipsorum elucescerent, & in futurum oriri & adaugeri possent in ecclesiis prædictis occidentali & orientali, siue inter præfatam Romanam ecclesiam, ac illius subditos & subiectos, & imperatorem ac patriarcham & Græcos alios antedictos, aliisque non expressis conclusionibus, decretationibus, sententiis, terminatio-

ANNO  
CHRISTI  
1438.

nibus, quomodo vel qualiter aliquid esse vel fieri debeat. Nec obstantibus aliquibus pignoribus & obligationibus publicis vel priuatis, neque accusationibus, excessibus, criminibus aut delictis, si qua prædictos, aut aliquem prædictorum, quoquo & quocumque modo acta & commissa fuerint, & vniuersaliter non obstantibus aliquibus aliis etiam, si talia essent, quibus in præsentem de illis opportunum esset specialem facere mentionem.

Si autem accideret, aliquem ex ipsis Græcis alicui occidentali & Romanæ ecclesiæ subiecto iniuriam vel læsionem aliquam inferre in persona, honore & rebus, vel alio modo, spectet eius delicti cognitio, vsque ad debitam, iustam & decentem refectionem & reintegrationem damni illati, ad imperatorem & patriarcham præfatos.

*Græcum delinquentem cognoscunt imperator & patriarcha.*

Econtra vero, si aliquem ex nostris, & nobis & Romanæ ecclesiæ subiectis, contingat alicui subiecto ecclesiæ orientali aliquam iniuriam, vel aliquam læsionem facere in persona, honore & rebus, vel alio modo, ipsa cognitio ad nos spectet, qui passis integre satisfieri curare debeamus.

*Italum delinquentem cognoscit papa.*

In aliis vero accusationibus, excessibus, criminibus, & aliis quæcumque fuerint, vnaquæque pars cognoscat, & suos iudicet.

Mandamus itaque omnibus & singulis prælatis, regibus, ducibus, principibus, locatenentibus, communitatibus, & aliis particularibus quibuscumque personis, cuiuscumque gradus vel præminentie existant, quæ Romanæ & occidentali ecclesiæ sunt subiectæ, quatenus prædicta, & eorum quælibet inuiolabiliter obseruent, & quantum in eis sit, faciant obseruari, præfatosque imperatorem, patriarcham, & alios omnes, & quemlibet eorum, ad præfatam Synodum venientes, ac inde redeuntes simul & diuisim fauorabiliter tractent atque suscipiant, celeremque & securum illis transitum præbeant. Volumus autem præsentem saluumconductum in sua vi & robore manere, quousque præfati imperator, patriarcha & Græci omnes superius nominati, cum suis familiaribus, & suis, vsque ad numerum præscriptum septingentarum personarum, Constantinopolim redeant. Datum Bononiæ pridie Nonas Iulii.

*Concil. Tom. 33.*

E ij